



**IHURIRO RY'IGIHUGU NYUNGURANABITEKEREZO RY'IMITWE YA POLITIKI
FORUM NATIONAL DE CONCERTATION DES FORMATIONS POLITIQUES
NATIONAL CONSULTATIVE FORUM OF POLITICAL ORGANIZATIONS**

ITANGAZO RIGENEWE ABANYAMAKURU

**ITANGAZO RY'INAMA RUSANGE Y'IHURIRO RY'IGIHUGU
NYUNGURANABITEKEREZO RY'IMITWE YA POLITIKI YEMEWE MU RWANDA**

Tariki ya 14 Ukuboza 2023, inama isanzwe y'Inama Rusange y'Ihuriro ry'Igihugu Nyunguranabitekerezo ry'Imitwe ya Politiki yarateranye, iyobowe n'Umuvugizi w'Ihuriro, Depite Nizeyimana Pie igirana ikiganiro na Perezida wa Komisiyo y'Igihugu y'Amatora Hon. Gasinzigwa Oda; ku "*Imyiteguro y'amatora ya Perezida wa Repubulika n'ay'Abadepite ateganyijwe muri 2024*".

Mu kiganiro cye, Perezida wa Komisiyo y'Igihugu y'Amatora yagaragaje ko, nyuma y'ifatwa ry'icyemezo gishingiye ahanini ku nyungu nyinshi ziri mu guhuza amatora ya Perezida wa Repubulika n'ay'Abadepite n'itangazwa ry'amategeko n'amateka agishingiyeho, Komisiyo y'Igihugu y'Amatora yatangiye gutegura imishinga y'amabwiriza agenga ayo matora harimo n'ingengabihe y'ibikorwa bitemanyijwe kugeza ku munsi nyirizina w'amatora.

Perezida wa Komisiyo kandi yagaragaje ko itegurwa ry'iyi mishinga bikiri mu gihe cyo kwakira ibitekerezo akaba ari yo mpamvu baje kuganira n'abahagarariye Imitwe ya Politiki nk'abafatanyabikorwa b'ibanze. Mu kiganiro, Imitwe ya Politiki yatanze ibitekerezo bizafasha Komisiyo kurushaho kunoza imyiteguro kugira ngo amatora azagende neza kandi buri munyarwanda yayagizemo uruhare.

Mu bindi, Inama Rusange yamaganye amagambo y'ubushotoranyi yuzuyemo ibututsi atangazwa na Perezida wa Repubulika Iharanira Demokarasi ya Kongo Félix Antoine Tshisekedi Tshilombo ashinja u Rwanda kugira uruhare mu ntambara iri kubera mu Burasirazuba bw'Igihugu cye no kwibasira Perezida wa Repubulika y'u Rwanda Nyakubahwa KAGAME Paul; mu gihe akomeje gushyigikira no gukorana n'Umutwe w'iterabwoba wa FDLR wasize ukoze Jenoside mu Rwanda kandi ukaba ukomeje no gukwirakwiza ingengabitekerezo ya Jenoside mu karere.

Perezida Félix Antoine Tshisekedi Tshilombo kandi akomeje gushyigikira ubwicanyi bukorerwa Abanyekongo bavuga ururimi rw'ikinyarwanda ashishikariza abaturage b'Abanyekongo kubwitabira aho gushaka umuti w'ibibazo byugarije igihugu cye.

Imitwe ya Politiki mu Rwanda ikomeje kwamagana ibi bikorwa by'ubwicanyi n'ubushotoranyi bikorwa y'ubuyobozi bukuru bwa Repubulika iharanira Demokarasi ya Kongo.

Bikorewe i Kigali, tariki ya 15/12/2023

